

NHHDCL ajanga New Delhi nung National Handloom Expo ayongzük



Handloom Haat, Janpath, News Delhi nung February 7, 2025 nü National Handloom Expo semzük dang tangokba noksa ka nung Dr. M. Beena, IAS, Development Commissioner for Handlooms, Ministry of Textiles, Government of India den Prasielie Pienyu, Chairman NHHDCL aser ketdangsürtem angur.

Dimapur, Tsüklai/February 07 (TYO): Nagaland Handloom & Handicrafts Development Corporation Ltd. (Government of Nagaland undertaking) ajanga February 7, 2025 nü Handloom Haat, Janpath, New Delhi nung ayongzükba National Handloom Expo sentong Dr. M. Beena, IAS, Development Commissioner for Handlooms, Ministry of Textiles, Government of India ajanga semzükja liasü.

NE handlooms züina aoba ngua Dr. M. Beena, IAS ajanga pelaba lemsatep aser yamaji züina aotsü langa lir ta ashi.

Iba Handloom Haat-i arur südaker shilem 60 shi Northeast nungi lir aser iba ama handloom expo yagi südaker nem market aser consumer temi komala aginer aji angatetdaksütsü aser customer temi aginüba ama

aben-süoshi atakba nung yaritsü, ta lai ashi.

NE nung yanglutetba ya bendang limai prokshitsü nükla tulu lir, anungji NHHDCL ajanga Handloom Export Promotion Council den teka tali amteper bendang limai yokba tali kumdaksütsüla, ta Dr. M. Beena-i ajungshi.

NE nungi arua alima dangpei indang handloom sayutsü asoshi ibai maongka shidak lir aser international market nunga handloom nükla lir aser asenok 'slow fashion' tendak lir, kechaser consumer temi yimya tajung nung fashion amshitsü indang tali bilemer, ta lai ashi.

Iba den handloom industry ajanga carbon footprint tajemba adokdaksür, anungji international market nung ibai premium section ka akumtsü akok, ta Dr. M. Beena-isa ashi.

Kasa mapang Chairman,

Nagaland Handloom & Handicrafts Development Corporation Ltd., Dimapur, Prasielie Pienyu-ia National Handloom Expo sponsor asüba atema Office of the Development Commissioner, Ministry of Textiles, Government of India dang pelaba lemsatep aser tarutsü nunga oba ama national expo tali ayongzüktsü imlar ta shisem.

Iba expo semzükba sentong nung Wennyei Konyak, Resident Commissioner, Nagaland House New Delhi; Er. Y. Lipongse Thongtsar, Managing Director NHHDCL; Ministry of Textiles, GoI, NHHDCL Dimapur aser Nagaland House, New Delhi nungi ketdangsürtem dena liasü.

Iba expo nung stalls 80 amenoka lir aser expo ya February 19, 2025 tashi lapoktsü.

DC Chümoukedima-i metetdaksür

Dimapur, Tsüklai/February 07 (TYO): Deputy Commissioner, Chümoukedima indang office ajanga sangdong ka nung, February 11, 2025 nungi tenzüka March 7, 2025 tashi High School Leaving Certificate/ Higher Secondary School Leaving Certificate (HSLC/ HSSLC) examination agitsü

alinung kaketshir iba tatidang agütsüba nung timtemtsüsa loud speakers/public address systems/generators sets/kisü-jensü mapa nokdang, ta ashi.

Iba tenokdangba ya nikongdang 6:00 ako nungi anepdang 6:00 ako tashi tatidang matem tashi alitsü, ta sangdong ajanga ashi.

EAC Shamator ajanga Sotokur Circle semdang

Dimapur, Tsüklai/February 07 (TYO): EAC Shamator, Mekato J. Aye-i February 7, 2025 nü Sotokur Circle semdanga shisaliok, health aser gender equality nung rangloker nüburttem ajurua liasü.

Iba mapang pai Kuthur aser Sotokur nung Community Health Centre aser school tem semdanga school nung tetsür chanu tenüng zülüoka shisaliok angazükdaksütsü tongtipang ta angatetdaksü aser Beti Bachao Beti Padhao (BBBP) sentong

tenzüker küm 10 ajungba benjonga süngdong atemba sentong ka agia liasü.

Aye-i school ketdangsür, kaketshir aser talisa HSLC tatidang agütsütsü renema alirtem den sensaksema liasü.

Ano village councils tem den senden balaka amendang Aye-i Community Health Officer (CHO) den lungjemer health awareness program ayongzüktsü aser iba sentong nung shilem ka ama kinü tanur temang anepaluba oset pai lema agüja liasü.



Nagaland Telecom Advisory Committee (TAC) züngsemtemi Feb 7, 2025 nü Wokha BSNL office semdanga yangji inyaker officer aser staff-tem den mensem ka mena BSNL network aser service koda tajungtiba agütsütsü ta asüba onük dak sentakba nung sensaksem akaba mapang tangokba noksa nung angur. TAC züngsemisa Feb 5 nü Tuensang BSNL office aser Feb 6 nü Zunheboto BSNL office-tem semdanga kasa sensaksema liasü. Mokokchung, 7th February, 2025.

Jalukie nung NCD indang training agütsü



CHC Jalukie indang Conference Hall nung February 6, 2025 nü Population based Non Communicable Diseases (NCD) screening indang District Level Training agütsüba nung adenertem tangokba noksa nung angur.

Dimapur, Tsüklai/February 07 (TYO): Population based Non Communicable Diseases (NCD) screening indang District Level Training ka CHC Jalukie indang Conference Hall nung February 6, 2025 nü agia liasü.

Dr. Viholi, DPO (NCD) ajanga training nung shisalen sayur aser shilem agirtem pela agizük aser iba training ya National Programme for Prevention and Control of Diabetes, Cardiovascular Disease and Stroke (NPCDCS) kübok agir ta metetdaksü.

Dr. Alemwapang, SPO,

NPCDCS ajanga Non Communicable Diseases programme indang tongmelang agi rateta ashi aser World Health Organisation report 2018 ajanga India nung NCD ajanga sür shilem 63 liasü ta metetdaksü.

Pai NP-NCD- PBS (CBAC), NCD- App/portal continuum of care, PBS strategy aser population based screening indang lemsatep, koba arishi küm 30 nungi tema nüburttem hypertension, diabetes, oral cancer, breast cancer aser cervix cancer tendangtsü nükjidong nung

NPCDCS kübok sentong tasen ka lir ta ashi.

Shilem agirtem nem Community based assessment checklist format, Registration in the family folder aser NCD App amshiba indang angazükdakja liasü.

Iba sülen State NCD team ajanga NCD portal mapping training agüja liasü aser Dr. Nitovi, SMO, CHC Jalukie ajanga melepzüng o jembi.

Iba training nung district nung aliba health centres balala nungi Medical Officers, Community Health Officers, NCD nurses, GNM aser ANM tem dena liasü.

DoSE-i 8th Pariksha Pe Charcha 2025 atema metetdaksür

Dimapur, Tsüklai/February 07 (TYO): Department of School Education (DoSE) sangdong ka nung 8 buba Pariksha Pe Charcha 2025 (Ato Kilonser-i kaketshir, tesayur aser tsürabur den sensaksemba) sentong Doordarshan-i DD National, DD News aser DD India amala nung February 10, 2025 anüngdang 11:00 ako nungi yoktsü, ta metetdaksü.

Private channels timba nung iba sentong ya live sayutsü. Ibai radio channels (All India Radio Medium Wave, All India Radio FM Channel) nunga live agütsütsü, PMO, MoE, Doordarshan, MyGov.in aser MoE indang YouTube channel, Facebook Live, DIKSHA, PM E Vidya aser MoE indang Swayamprabha channels tem nung Live Web streaming asütsü.

Kasa sentong ya online nunga <https://www.youtube.com/watch?v=G5UhdwmEELs> ajanga reprangtetttsü.

Iba dak sendakba nung

Nagaland state kübok aliba Schools (Government & Private) ajunga tekolakpur dang nüngdakba mera agia Class 6 nungi tema tanur ajunga nem iba live telecast reprang/ angadaksütsü metedaksüogo.

TV aser electricity connection maliba school tem nung temelen (Computer/ Laptops/Mobiles, etc.) anepalua kaketshir nem iba anogo Ato Kilonser indang live address reprang/angadaksütsüla, ta ashi.

TV reprangtsüsa maliba meta talak nung radio/ transistors anepalua school tanurtem nem angadaksütsüla.

Iba sentong atemba sülen school ajaki iba sentong reprangba/angaba kaketshir aser tesayurtem züngdang tanur temi iba sentong reprang dang tangokba noksa ana Directorate of School Education Nagaland (DoSE) Online School Monitoring Portal <https://school.dosenl.in> nung kasa anogo (10/02/2025) nikongdang 3:00 ako tashinung agütsütsüla, ta sangdong ajangasa ashi.



February 07, 2025 nü New Delhi nung Ato kilonser Narendra Modi-i Union Ministers- Chirag Paswan, Giriraj Singh aser Rajiv Ranjan Singh nunger den Bihar nungi NDA MP tem ajuruba sülen tangokba noksa nung angur.

Modi-i Feb. 12-13 nung US semdangtsü

New Delhi, Tsüklai/February 07 (Agencies): Ato kilonser Narendra Modi-i February 12-13 anogotem nung United States semdangtsü aser iba mapang nungji pai US Tir, Donald Trump-a ajurua senden amentsü.

Taoba ita Trump-i US Tir tenangzükba agia liasü.

Anogo ishika jakdang US-i par linük ozüing alema arua alir India nunger 104 linük nungi meindoka US sepaitem tayimtsü ka nung India tonga anir arutsüogo.

Hokolbarnü Foreign Secretary Vikram Misri-i, "Trump tenangzükba agiba sülen US semdangter mezünpur lenirtem rongnung PM Modi densemstü. Sorkar tasenba tenangzükba agiba

sülen hopta asem majungdang US semdangtsü atema Ato kilonser Modi jaokba ya ajanga India aser US na tsüingda tesendaktep junga aliba temaitsü sayur," ta metetdaksü.

Trump-i Israel Ato kilonser Benjamin Netanyahu bo ajuruogo aser tan hopta Washington nung Trump-i Japan Ato kilonser, Shigeru Ishiba-a ajurutsü.

Trump mezüing kümsük Tir inyakba mapang nunga Modi tena ajuruteba liasü aser taoba hopta nunga tena phone ajanga jembio.

Lenir anati tsüingda sensotemi linük nungi kati oa aliba, security aser shishilembaba tsütsü tesendaktep onüktem nung o

lemtepa liasü.

Trump aser Modi nati asen nüburtem ajungtsü aser alima nung yimjung atema külemi longjemer inyaksü, ta Misri-i metetdaksü.

Yaküm Trump-i Ato kilonser Modi ya lenir tajung ka ta shiogo, ajisüaka pai India ya saru agiba nung chuba aser shishilembaba tesendaktep anema inyaker ka, ta jembia liasü.

Trump mezüing kümsük Tir inyakba mapang nung Houston nung pai Narendra Modi atema 'Howdy Modi' ta ser sentong ka ayongzükba agi. Iba sülen Trump-i India semdangba mapang nung Ato kilonser Modi-ia Gujarat kübok Ahmedabad yimti nung 'Namaste Trump' ta ser sentong ka ayongzükba agia liasü.

Line of Control nung Pakistan nunger 7 khaset

New Delhi, February 07 (Agencies): February 4 ayaterm mapang nung LoC (Line of Control) nung India nunger sepaitemi Pakistan nunger tenet khasetogo; parnok rongnung 2-3 bo Pakistan Army tem liasü, ta osang ka ajanga metetdaksü.

Pakistan nungertemi 'Kashmir Solidarity Day' amongba mapang nung Jammu & Kashmir nung Poonch district kübok Krishna Ghati sector nung Pakistan nungertemji khaset.

Osang angazükba agi, Pakistan nunger Border Action Team (BAT)-i forward post ka amaktsü sentong lia Indian Army temi parnok khaset.

Sepaitemi khasetba Pakistan

nunger tenet rongnungji ana-aseambo Pakistan army liasü aser tanüingbaji Al-Badr telok nung züngsemtem asütsü akok.

Tan hopta tetenzüklen Pakistan Ato kilonser, Shehbaz Sharif-i, Pakistan-i India den ken o jembiba ajanga Kashmir onük densema mangatettep ken o ajak bentetner, ta jembia liasü.

Pakistan occupied Kashmir (PoK) nung Jaish-e-Mohammed (JeM) aser Lashkar-e-Taiba (LeT) nungi commander tem senden ka mena Pakistan nung lenirtem anemsü, ta jembiba mapang ka nung Pakistan Ato kilonseri iba o ya jemi.

India-i mapang ajak nung, Jammu & Kashmir aser

Ladakh ya akhidang nungi India shilem liasü aser teti India shilemsa asütsü, ta ashir.

India-isa, arrtsülen tesünap ali nung ang aser kiralongra mali nung ang Pakistan den tesendaktep tajung ayutsü, ta ashir.

2019 küm Modi-i aniba Centre sorkari Jammu & Kashmir nung Arlla 370 agienba mapang nungi tenzükba Pakistan den shishilembaba densema lenla aika nung tensendaktep raksaogo.

Tesüiba ita ishika tsüingda Jammu region kübok district aika nung kiralongra tatalokba kanga bulua ataloker. Kiralongra balala nung sepai 18 densema nisung 44 süogo.

Ano India nunger 487 US nungi meindoktsü

New Delhi, February 07 (Agencies): Hokolbarnü Centre sorkari, US ketdangsertemi maneni par linük nung ozüing alema arua alir India nunger 487 jangjaogo; kobi melii parnok India-i meyipa yoktsüa akok, ta metetdaksü.

Osangbenertem senden ka nung jembidang India Foreign Secretary, Vikram Misri-i, America-i ano India nunger 487 meindoktsü ta India nem metetdaksüogo, ta ashi.

Foreign Secretary-isa, iba dakji alia ano ozüing alema US nung alir India nunger aika jangjatsüa akok, ajisüaka US ketdangsertemi tang tashi nungbo iba dak sendakba osang tejangja memetetdaksü, ta ashi.

January 5 nüa US sepaitem indang tayimtsü ka nung India nunger 104 anir aruja nikongdang Amritsar yimti atong. India nunger 104 ji tayimtsü nung anir aruba piyong tetsüing-teben ajak alener liasü; Amritsar atongba sülen ang chain lisüji salatsü.

US-i India nunger dak

mejungi benshiba atema opposition-i longkak aitba mapang nung, Misri-i, "Atangji iba ya tebilemstü onük ka lir. India sorkari iba atemaji US ketdangsertem den jembitsü," ta metetdaksü.

External Affairs Minister (EAM), S Jaishankar-i, 2009 küm nungi tenzükba ozüing alema US nung oa alir India nunger 15,668 India-i meyipa yokogo, ta metetdaksü.

Rajya Sabha senden nung Jaishankar-i, linük nungi meindokba inyakyimji küm aika benshia arur, iba ya tang tasen masü, ta ashi.

Jaishankar-i, US nungi meindokba inyakyimji Immigration and Customs Enforcement (ICE) ketdangsertemi benshir aser ICE-i 2012 küm nungi tenzükba tayimtsü ajanga meindokba inyakyimji benshia arudar, aser inyakyim nung tenokdangba (lisü agi alenba) densema lir, ta metetdaksü.

"Ajisüaka tetsür-tanurtem dakbo ibaji mebenshi ta ICE-i onok nem metetdaksüogo," ta paisa metetdakja liasü.

Tetsür cr. 14 dak mama cancer tendang; 57,184 dak putet: Nadda

New Delhi, February 07 (Agencies): Hokolbarnü Union Health Minister, JP Nadda-i, linük nung tetsür crore 14.6 dak mama cancer tendang aser parnok 57,184 dak mapa cancer putet; iba nungjagi parnok 50,612 bo treatment agidar, ta metetdaksü.

Lok Sabha senden nung tasüingdangba ka langzüdang NCD portal data nung ajemdaker Nadda-i, linük nung tetsür crore 9 dak cervical cancer tendang aser 96,747 dak iba cancer putet; iba nungjagi parnok 86,196 treatment agidar, ta metetdaksü.

Non communicable diseases (NCDs), talisa mama cancer aser cervical cancer densema NCDs tashidak tapu pongu tendangtsü aser yaritsü atema 2018 küm NP-NCD kübok sorkari National NCD Portal tenzükba liasü.

High blood pressure, diabetes, oral cancer, mama cancer aser cervical cancer ama NCDs atema 2010 küm Department of Health & Family Welfare-i National Programme for Prevention and Control of Non-Communicable Diseases (NP-NCD) tenzükba liasü.

Iba programme kübok linük tesem balala nung district 770 nung NCD clinics lapokba den cardiac care units (CCU) 233, district 372 nung day care centres aser NCD clinics 6,410



lapokogo, ta pai metetdaksü.

Odisha nung district 30 nung NCD clinics lir, CCUs 12, district 32 nung day care centres aser community health centres 414 lapokogo, ta Health Minister-i metetdaksü.

National Health Mission (NHM) shilem ka ama National Programme for Prevention and Control of Non Communicable Diseases (NP-NCD) kübok Department of Health and Family Welfare-i states aser union territories nem technical teyari agütsüba den külemi senotsü teyaria agütsür, ta paisa metetdaksü.

NCDs atema risk assessment ji CBAC ajanga inyaker aser high risk nung alirtem dang NCDs tendangtsü atema ajungshir, ta paisa metetdaksü.



New Delhi, February 07, 2025: Tawa Sri Lanka Navy temi India nunger angopurtem aika apuba anema Hokolbarnü Parliament kima DMK MP temi longkak aitba noksa nung angur.



TIR YIMYIM YIMOBILEM (EDITORIAL)

DIMAPUR KÜPTOKNÜ, FEBRUARY (TSÜKLAI) 08, 2025

Ozüng raksarbo meyaritettsü !

Tang US nung Donald Trump tir kümer külen par lima nung temelaba magii özüng alema arua alirtem ajak meindok tenzükogo aser item rongnung India nungertema nisung 104-bo US sepaitemi tetsüing teben alener parnok tayimtsü nung bener arua India tongtsüogo aser ano aika US nungi India-i meyipa yoktsü anendaka lir. US lima ya mapa inyaknertem asoshi ayangdak tajung lir, anungji asenok ama sensaker lima nung mapaa maka aser chiyongtsüa maka ta alirtem aikati US ama takar limai orr ayangner aser oa senso kuma linür. Ajisüaka, US limai aotsü atema temelaba angutsüji temela masü, anungji aikati temelaba manguyonga tezülen nungi US lima telongi aitsü asoshi meranger. Aji oda, aikati tangar teyari agia temelaba maliyonga tezülen nungi US limai iteter saka ano aikati meiteter. Ano, yaküm kumbo tesasatsü ka atalokbaji, Gujarat nungi kibong kabo tebu o tetsü nati par jala küm terka tain aser küm asem tain jabaso ka anir, parnok ajak India nungi apusoa orr tezülen ka nungi tetsüing agi özüng alema US telongi aitsü merangdang, temekong agi metitet, parnok ajak temang rüjep kümer asüba osang asenoki angashir alitsü. Iba amaji India nungertem dang masü saka alima tesem balala nungi temelaba mali ser US arrtsü anasa aliba yimtittem nung oa anentsü aser idak nung jagi tetsüing agi miima US telongi aitsü merangteper. Aji oda, nisung kar asoshibo bendangertem temelaba mali ser US nung linertem yaria tezülen nungi US-i idaktsübaji senotsü aaba 'business' tajung ka amai inyaker. Item nemji tangar bendangertem, India nunger tang US nungi meyipa bener yokertem amaji, mesüzükdaktsür. Ibaji tanü asen lima nunga asen kidang alitsü atema tangar bendanger chanu bushia bener arutsürtem amai lir. Itemji kar pi kidang ki mapa nung yariteper, kar alu tapu balala nung ayanger aser kar mapa inyakdak tesem balala nung inyaker. Aji oda, tanü asen lima nung asenoka aika tangar bendangertem teyari medenibo pei kidanga soruchioka mechiyongtettsüsa aküm ama, US nunga kibong aika item bendanger kilir aser ayangertem medenibo melitettsüsa kümogo. Ibayongji, aikati bendangertem temelaba magii özüng alema US nung alirtem nemji yimli ka agütsüdaktsüner. Ajisüaka, US asoshi lendong kaji, item özüng alema arua US nung alirtem shia tebilemba aser nükjidongji memetet, kechiyong item rongnung, ashiko, nisung karbo tebilemba tamajung agi US nung senso kuma lir kiralongraba mapa inyaktsü nükjidong alitsüa akok aser aji shingaia nunga ta meshitettsüba shisaboluka lir. Iba tangatetba aser shisabolu jagi Donald Trump-i pa tir küm mekümka US nung özüng alema aita alir bendangertem ajak bushia aputsü aser meyipa yoktsü asoshi US sepaitem nem tashi agütsür inyakdaktsür. Atangji, US nung mapa inyaka lia ajungbena pur pei limai yokbaji taochi makaba mapa ka amai, saka temelaba magii bendanger ka tangar lima nung alibaji özüng raksaba mapa tuluka lir, anungji özüngi melaba ama inyaktsüla. Aji oda, nisung tepseter mesüra ashir-auer ka mesüaka, temelaba magii pi lima arrrsü alema ir alibaji özüng raksartem lir, anungji pei senso aser pei nisung süaka item purtemjibo mesemtetsü aser meyaritettsü ta India government-i metetdaktsüogo. Iba ken o nungji tangatetsü,tagitsü aser tansütsü o keta lir. US nung amaji, tanü asenok rongnunga, talisa lanurtem, nisung aika India tesem balala nung özüngi memelaba mapa nung ayangertem aika lir. Aji oda, talisa taila 'Call center' balala nung inyaker Naga nunger lanurtem aika police-i pua tepuokdak ayuba osang asenoki angashiogo. Kena asenokbo temeim agi state government teyari ajanga item lanurtemji tepuokdak nungi aniteta anir arur, saka ano okadak ken o bo metembang alitsü aser ano karbo tanüa, iba ama meteta aser memetet özüngi memelaba tesemtem nung inyaka alitsüa akok. Tanübo, government-i yaritepa pei kidangi anir arur, saka asüngbo Nagaland government-ia Center government i ashiba amaji, özüng raksartembo pei senso asüyonga meyaritettsü ta shira koda asütsü ? Özüng raksarji özüng raksar, anungji asen pi ta mali, özüngi dang merentsüla. Yangji angatetdi.

OLEMSABANG

AO LIMA NUNG TSÜNGREM AKÜMTSÜBUR KIBONG

~ S. Nuken J Longkumer, N. United Nagaland

Ans: Tsüngrem akümtsübur wapong Jepdakyangba Aolima takar kibong nung zungsema aru, pai inyakba mapa tajung aika lir, par chir J.N. Aier Yajang lima soteta Nagalima, Aolima aser tsükong sanger ajungmesoa anir aruba taküm ka liasü, par chir Dr. Bendangliba soteta Minister menden tashi moatsüogo. Koda jangratemtsü Tsüngrem akhumtsübur kibong. America nunger takar kibong ka John Miller otzü kodang bushidangtir onsara tanang liasü, missionary kibong süaka ochi temeim aser sensaker yarinüba, aria bilemba missionary taküm par semlchirtem tajung adokba otzü agi sayubaji semchir 886 nungi Vice President ana aser tanungba menden bulu jenjang tongtetbaji 732 liasü aser business inyaker takar 3 tashi moatsüba otzü asenoki meteta lir. Otzü aika lir tesulen ano asenoki bushiyonga odi. Alima ya shibai raksa mesüra menentsür shiruru masü asenok meimchirtemi raksa? Kechiba Donald Trump U.S President tanaben aru? Pai jembiba O to angatangma Tsüngrem akhumetsübur America lima mi agi rongdoktsü ta ayim. Aser pai teyanglur Tsüngrem nem tenungsang agütsüogo, tanü alima ya kechi kuma aor asenok ajaki angur.

Q:- Ochishir aser sensaker meimba J.N Aier otzü kodang repringdir memetet tenük nungi nüktsü aludaktsür, pa taküm nung timtermertem yarinüba ajemalua litetba ano aika angutsü, yamaji Naga nunger kar adokra, tanaben Naga lima Missionary lima ajaba to ataloktsü. Nepu tajung aika nungtugo taküm aika tezülen toktsüa lir. Joko aramesoang asenoki akoktsü tamang tang amangti. Mosa taküm ama Tsüngremi asenok anitsü, maneni sarasademang. Iba den shisalen sayur Mr. Aolepden Longchar Lirmen dang pelar Tsüngremi agütsüba shisatsü tajung sayuba mamateter, ochishir aser ajemaluba timtemer yaria aruba J.N Aier jabaso Dr. Benjung sotetdak Yajang lima MLS 3 tashi adokba yimti Tsüngremi moajangma. America Missionarytemi bener aruba osangtajung agizüker mezüngbur rongnung atenba süngjang bilemtetdang.

Tir Yimyim na mali asübo iba O kong angutsü kong proktsü liasü? Otzü ya mopung ama taküm rongsen aser alima jangratemtsü ajak süitema oadoktsü saka Tsüngremfer ochi O teti alitsü. Tanü na tulur aser takar asüngbo tangar ka arutsü, semchirtemji temoatsü süngjang tulutiba lir, ochi süngdongbo nür atepzüng nung lira tanang adoktsü, Tsüngrem akhum metsübur kar aliasü tia maka.

NB: - Mangdang makaba lenirtem alimai amadoker, saka alima aser nupur tenzüka aliba takümji alimai mamateter, iba dangji Nokinketer ta ajazr, tanü tashi Nokinketer otzü jembir, item ajakji Tsüngremer tekabu nung tempangogo.

AROGO TENZÜKBA ASER RONGSEN KETDANGTSÜBA

~ Wati Longchar (Eralibill),

(Yashi adok nungi...)

Tanü alima rajang kümdaktsüba tashitak tulutibaji ochimashi ya lir. Aikati bilemer sen dang lirbo tepiri, aser terenlok mapa ajak inyaktetsü, saka aji tangatetba tai lir. Ochi agi dang terenlok bener arutsütsü akok ta angatetdi. Tat. agi., Nagaland ruling party nung liakasa, sen aika centre nungi yokakasa, lenir aser nüburi ochi meinyakba ajanga teraksa aika bener arutsüba angur. Nagaland teküboktiba jenjang nung alibaji ochimashi ajanga ta kuli sayur. Ochi nung rongsen ketdangtsüba ajanga dang Nagaland yanglushitettsü.

Temalen ashiba ama, ochi nung rongsen ketdang sütet nung dang arogo tejakleni otetsü. Tamangertemi Tsüngrem nem ter shilem aser tamang tenla agütsür. Anungji arogo rongsen ajakji Tsüngrem meyong, aser ochi nung achaayangtsü arogo tenzüker nem dang nungloktsü. Tenzükeri arogo rongsen timi achaayang masübaji Tsüngrem meyong rongsen timi ketdang masüba lir. Meimchiri sen kanga meimer aser ochi meshi inyaker atar. Arogoji temeshi süaka, meimchiri dang inyaker asü nung rongsen amshiyim telatet tanganga melira, lendong aika ajurutsü aser tenzüka kuli maka akümtsü. Ao arogotem nung rongsen amshiyim tim mesüi amshiba aika ataloka arudagi. ABAM nung, lim arogotem aika nung tenzükertemi tim mesüi rongsen amshiba, kibok nung dang "adjust" sür ola madok yutsüba osang aika angashir. Iba Tsügremer rongsen memerüki amshiba ajanga nüburtem temulung yirur. Arogo rongsen amshiba nung nütsüing nüburtemi temulung melemtetra ter shilem aser tamang tenla agütsüba ajema akümtsü. Item tenzüker ya anenerang ter shilem aser tenla agütsütsü ta nüburi jembitsü aser nüburtem tanela nung yirutsü. Arogo nung tanü sen amshiyim repringshitsü kanga nungdaka lir.

Tanü cyber, digital world putu joko "cyber office" kümteta financial transaction kanga merüka transparent süa bener aoba putu, saka Ao arogotem nung akhi putu inyaka aruba sen amshiyim nungi mepila. Arogo nung rongsen koda ochi nung ketdang asütsü, accounting management arogo nung toklang tenzüker ajak nüngdak. Ya theory dang masü, saka practical den angazüktsü nüngdak. Mungdangi küm ana-asem ka iba training nungji temulung agütsü nung temelenshi aika bener arutsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Rajasthan nung BJP sorkari anti-conversion bill ka benokogo

February 07, 2025: Hombarnü (February 03) Rajasthan assembly nung Bharatiya Janata Party (BJP) sorkari anti-conversion bill ka benokogo, iba ozüing kübok aibelenertem küm 10 tashi tepuokdak ayutsü.

Rajasthan Prohibition of Unlawful Conversion of Religion Bill, 2025 ya state nung tamangba yimsü meyipdaksüba nokdangtsü atema lir, aser iba ozüing ya agizükra iba ozüing kübok aibelenertem nem bail magütsütsü.

Osangbener den jembidang Evangelical Fellowship of India (EFI) General Secretary, Rev. Vijayesh Lal-i, "Iba bill ya mejangjaba timtem ka bentettsü atema lir saka iba ya ajanga atangji timtem ang bendenloksür. Ketdangsertem nem tashi agütsüba ajanga tanga state tem nunga tiyazü nung aika pua amokmerenogo. Yimsü meyiptsüpur ka tenüing yimjak nung metetdaksüra nisung mashie kati tai tongloksütsü akok mesüra amokmerentsü. Iba ya linük temzüing kübok temeden anema lir," ta ashi.

Medical & Health Minister Gajendra Singh Khinvsar-i iba bill ji benoka liasü. Iba ozüing kübok tamangba yimsü meyiptsü tebilemba alirtemi anogo 60 jelia District Magistrate nem metetdaksütsüla aser yimsü

meypidaksüba ketdangtsüa agitsüpurtemi ita ka jelia metetdaksütsüla.

Iba ozüing kübok kangshia, mesüzüka mesüra ashiokja tamangba yimsü meyipdaksüra senchi achiba den külemi tepuokdak küm aika ayutsü.

Ozüing alema yimsü meyipdaksüba nokdangtsü nükjidong nung benokba bill nungji aibelenertem küm 10 tashi tepuokdak ayutsü aser senchi sen 50,000 tashi achitsü lateta lir.

State Health Minister Gajendra Singh Khinvsar-i benokba bill nungji o lemteptsü aser tan assembly senden nungsa agizüksüa akok.

Iba ozüing kübok tashiyim amshia, mesüzüka, kiyimba mesüra ashikülak ajanga tamangba yimsü meyipdaksüba nokdangtsü. Aibelenertem küm ka nungi pongu tashi tepuokdak ayutsü aser senchi 15,000 achitsü.

Ano tanurtem, tetsür mesüra Scheduled Castes/Tribes nisungtem tamangba yimsü meyipdaksüba nung aibelenertembo küm 2 nungi 10 tashi tepuokdak ayutsü aser senchi 25,000 achitsü. Ano nisung aika yimsü meyipdaksüba nung aibelenertembo küm 10 tashi tepuokdak ayutsü aser senchi

50,000 tashi achitsü.

Iba ozüing kübok aiben aibelenertembo temerenshi tuluba agütsütsü.

Iba Bill pusema Parliamentary Affairs Minister, Jogaram Patel-i, iba ya ajanga 'love jihad' nokdangtsü ta ashi. "Love jihad" tetezü Muslim nungertemi Hindu tsürtem den kibong akümba sülen Islam yimsü dangi meyipdaksüba lir.

Patel-i, "Love jihad tatalokbatem ya tebilemtsü onük tuluka kümogo, iba ya ajanga loktiliba nung tebilemtsü bener arutsür. Iba bill ajanga item ama inyakyim nokdangtsü," ta ashi.

Rajasthan nung Congress party-ibo iba bill sashia aitsüogo.

Opposition lenir Tika Ram Jullu-i, sorkari loktiliba nung telemsa adokdaksüba dang nungibo tongtibang onüktem nung ang rangloker inyaksüla, ta ashi.

Iba bill kübok tamangba yimsü meyiper ka tenüing, talidak aser yimsüji district magistrate office kima board nung sayatsü.

Rajasthan nung iba bill ya agizüka ozüing kümra India nung anti conversion ozüing benokba state 12 akümtsü.

Rajasthan nung iba bill ya tan budget senden nung agizüksüa akok, kechiyong state assembly nung BJP züngsem peria lir.

ANOGO ABEN TSÜNGREM DEN

JILU TAMAJUNG ENDOKANG

Temeimba, nai tamajungba jilu maji-i, kechi tajung iba jilu ajiang. Shibai tajung inyaker pa Tsüngrem nungi, shibai tamajung inyaker pai Tsüngrem mangu.

~ 3 Yohan 11

Alima nung meimchir taküm ka dak yimya, liba liro balala aika keta angur. Tajunga süang mesüra tamajung süang tan? itemji ajiz?ka beshitsü kanga temela saka, aji indoktsü sak saker. Achi ajemba, sobusülemts? jembiba, jajaba, inyakra aser yamala mesük ajak ajizüka amshiteper. Iba jilu ajitepba ajanga tanü asen lima nunga yima tajunga aika angaz?ka tejakleni odagi. Kasaji, tamajung jilutema aika angazüka kija, kibong, lokti, arogo tentet balala nung teraksa aser lendong adokdaksür.

Anungji, tan? Lai O nung ashiba ama tamajung jilu maji-i kechi tajung, koba Tsüngrem nungi lir aji taküm nung beshitsü ayongzüker. Tsüngrem chir tajung ka ama Pa jilu tajung ajizüka taküm wadang ajak nung amshitsü angazükdi. Aser tamajung jilutem kechisa lir item ajak dang nunga ta shitetba tamanger ka ka asütsü merangdi.

Idaki Tsüngrem chirtem aser mojing chirtem jungkai udoker;shibai temeshiba meinyaker, mes?ra shibai pei adianu memeimer pa Tsüngrem meyong masiü. 1 Yohan 3:10

Missionary Wayne Myers alima nungi pilaogo

February 07, 2025: Mexico nung küm aika missionary inyaksang, Wayne Myers alima nungi pilaogo; pa arrshi küm 101 liasü.

Pa asüba atema Latin American Khristantem, talisa Mexico nung Khristantemi mangyimdar. Wayne Myers-i küm 80 dak tali Tsüngrem tenzükogo.


Myers'er kinüngertemi social media ajanga, "Onoki meima alisang Wayne, pai kanga meima alisang Kibuba dangi ogo ta kinüngertemi sangdonger. Tebu tajung ka, tembar tajung ka aser Tsüngrem tenzüker ka taküm atema Tsüngrem nem sentsüwangshi agütsür," ta

metetdaksü.

Wayne ya 1922 küm Mississippi kübok Morton nung aso. Pa arrshi küm 14 asüandang pai Khrista nem taküm bendanga agütsü aser Mexico nung tenzüksü atema Tsüngremi pa den jembia liasü. Tesüiba küm aika tsüngda pai nisung aika Khrista dangi meyipdaksü aser sayatenya mapa aika kuli süa nguogo.

Pai talisa tamang indang tesayuba agütsü aser tamangertem dang Tsüngrem dang melung alemtsü ayongzüka liasü.

Arogo 10,000 dak tali tentetba nung pai yaritepa liasü aser lisopur oshi balala nung



Wayne Myers

Laishiba meyipzükbä maparen nunga pai yaritepa aruogo.

Iba dak alia pai Khrista osangtajung lemsateptsü atema social media-a amshi.

Pa indang tongtibang omen

kaji "Agütsütsü atema taküm liang aser tenzüksü atema taküm liang" liasü. Pai Mexico nung asentenshi milak tulu jangrutsü yongya aser Khrista temang nung longjemtsü atema rangloker inyak.

Pa tenzükbä mapang piyong pai Tanela Temeshi nung baptitsüji kanga tongtibang, ta jembia aru.

Pa alima nungi pilaba osang angashia Latin America nung pastor tem aser evangelical lenirtem aikai social media ajanga mangyim jashi lemsatepba den külemi asür nem akhüm agütsüogo.

Guatemala nung aliba Casa de Dios Church nung pastor,

Cash Luna-i Facebook post ka ajanga, "Wayne Myers, alima nung Tsüngrem tenzüker tajungtibatem rongnung na densema liasü. Yisu sülen anidakertem ajak asoshi na ya ajungmesor ka liasü. Onoki na kanga menungratsü," ta lemsatep.

Evangelical Fellowship of Mexico-i sangdong ka ajanga, "Sorkari lateta aliba ama inyakyim ajak shidak beshitsü atema onoki inyaker. Onoki tekeraba nung social media ajanga asüpila sentong agitsü anogo mapang metetdaksütsü. Ibaji ajanga asenoki longjemer Wayne nem akhüm agütsütettsü," ta metetdaksü.

Impur nung Asso. Pastor Youth aser Key leaders atema training ka agi



Impur, Tsüklai/February 07 (TYO): ABAM Youth Ministry ajanga ayongzüka February 3 nungi February 5 tashi Impur nung Asso. Pastor Youth aser key leaders atema contextual training ka temoatsü ngua agiogo, ta ABAM Executive Secretary, Rev. Dr. Mar Pongener-i sangdong ka ajanga

metetdaksü.

Tanü lanurtem tebilemba, tangatetba aser mangdang khenyongi temaba nung libaliroa aoba tensa ka nung par den liromedema Laishiba nungi mepilai aotsü aser tang aliba lanurtem (Generation Z) par lenisüba mapang arudang lenisüba shitak sütettsüsa

tesayuba agütsütettsü nükla nung tanü tongti lenirtem asoshi iba sentong ya agiogo.

Iba sentong nung Shisalen sayurtemji Rev. Temsüwati, Pastor MTBA aser Shalom Bible Seminary nung Assistant Professor, Alivoker Aier na liasü.

Tekülem mapang nung Rev.

Akangmongba Pastor Yisemyong Baptist Arogo, Rev. Jongpong Pastor Mopungchuket BA, Mr. Kilem Pastor Süngratsü BA, Mr. Toshi Sanglir Secretary ABAM YM aser Mr. Teka Imchen Coordinator, ABAM YM nungeri lenla balala nungi onük tajung bener arua jembia lanurtem ajak temoatsü nguogo.

Ajak agi Arogo 98 nungi Associate Pastor Youth temi anir Key leaders 533 arua iba sentong nung shilem agia denogo.

Maneni lanurtemi Arogo nung Tsüngremer wadang inyakdang lanurtem jenjang temaba nung ajungkettsü sarasademer.

AO OSHI ANGAZÜKDAK:**TANÜ ANGAZÜKTSÜBA OJANG****Teinyakmar**

(adj) mapa tater, renemtsü anasa (about to finish a work)

* Yashi ozü lu teinyakmar lia tzünglu aru.

Teinyaktsü

(v) mapa aser sentong renema akaba (responsibility, work to be done)

* Nisung shia pei teinyaktsü mapa aika lir.



Tir Yimyim

OLONG PAITEP # 7058

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti

- (5)

4. Tsük rudenba

- (5)

6. Temzüng tesashi

- (5)

8. S _ _ _ i

- (3)

9. Nisung telemasa

- (3)

10. Anogoshi

- (4)

12. Ajanga aor

- (4)

13. Tsük rüzügdak

- (3)

14. Tebang nungi adokba

- (3)

16. Süngdong tatembangtiba

- (5)

17. Meputep

- (5)

LANGTSÜNGLEN

1. Tenük telong

- (9)

2. Committee dang ajar

- (5)

3. Yagi ki okdoker

- (7)

5. Yim lenmang

- (5)

7. Temoatsü keter meyipa aruba

- (9)

11. Kanga junga menemba

- (7)

12. Majinü

- (5)

13. Tzüma nung senzüba

- (5)

OLONG PAITEP # 7057 TELANGZÜBA**TIPIEN :**

2. Bangsemo, 6. Tiptem, 8. Jen,

9. Talila, 11. Aren, 12. Tzübo,

14. Alia, 16. Angati, 17. Odi,

18. Azü, 19. Sünglang.

LANGTSÜNGLEN :

1. Yipten, 3. Nüja, 4. Sangro,

5. Milen, 7. Tulu, 10. Laza,

11. Aben, 12. Tiyong, 13. Ajizük,

14. Aitsü, 15. Tasa, 16. Aina.

NAI-A YA METETTER MA

Rajasthan Education Department-i February 3, 2025 nü Surya Namaskar sentong ayongzüka agidang nisung crore 1.33 ajanga shilem agiba atema otsü tasen ka yangluogo.

'Surya Saptami' nung agiba sentong ya World Book of Records-i asadanga liasü aser parnok ketdangsür Pratham Bhalla-i Rajasthan Education & Panchayati Raj Minister Madan Dilawar nem world record indang provisional certificate ka agütsüogo.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1 buba Guwahati Asian Film Festival 2025 tenzükogo**Guwahati, February 7, 2025**

(Agencies): February 7 nü Jyoti Chitraban Film Studio nung Guwahati Asian Film Festival (GAFF) 2025 tenzükogo.

Anogo asemnü indang cinema benjung ya tanü nikongdang tenzük aser opening film ji nüngtugu director Babak Khajehpasha ajanga yangluba 'In the Arms of the Tree' Iranian film liasü.

Tanü Carlo Obispo ajanga 'A Lab Story', Dhiraj Kashyap ajanga 'Amateurs', Khanjan Kishore Nath ajanga 'Ata Nirjon Duporiya', Mohammad Hamzei ajanga 'Captain', Biplob Sarkar ajanga 'The Stranger', Vuslat Saracoglu ajanga 'Not

What You Think' aser Jamshid Narzikulov ajanga 'House' film tem sayua liasü.

Iba sentong nung Sri Lankan filmmaker Prasanna Vithanage aser Indian theatre & film actor Sheeba Chaddha na aden.

Tanü anüngdang 'The Future of North East India Cinema: Challenges, Opportunities and Global Prospects' indang discussion session ka agi aser idanggi critic & filmmaker Utpal Datta, Sibanu Bora, Kangkan Deka aser Deep Chodhury nungeri shilem agia liasü.

Sentong nungsa tongtipang actor Sheeba Chaddha-i lai ajangshia arubatem lemsatep.

"GAFF 2025 ya storytelling,

artistic excellence, aser cultural exchange benjungmong ka lir. Onoki Guwahati ya Asian cinema indang tongti tesem kümdaktsünür aser tesentaktep balala yua cinema tapu balala sayunür. Iba benjung ajanga filmmakers aser cinephiles ajungmesotsü imlar" ta GAFF 2025 Festival Director Monita Borgohain-i ashi.

Honibarnü films nung film 10 tashi sayutsü aser taruba anogo ana tsüngda Asia kübok tesem balala nungi film tem sayutsü sentong lir.

GAFF 2025 ya Trending Now Media ajanga ayongzüker aser GMDA, Indian Oil, NRL, Oil India Limited, Assam Tourism, Bodoland Tourism, Sony, Nikon, Purabi Dairy, Life's Purple PR, Travels Pro, Modern English School aser Priya Communication teloktemi nungita yariteper.

GAFF 2025 nung Asia kübok Iran, Nepal, Uzbekistan, Kazakhstan, Bangladesh, Hong Kong, Azerbaijan, Philippines, Sri Lanka aser Turkey linüktem nungi feature films 200 aruba nungi 25 sayutsü.

Maneni, North-East India nungi films atema competitive section balaka alitsü aser iba nung Best Film, Best Direction, aser Best Performance telemsatem dena lir.

Namghar & Heritage Centre ajanga state ana sendakteptsü**Dibrugarh, February 7, 2025**

(Agencies): Assam aser Arunachal Pradesh tsüngda arrtsü ken o ya kanga tejen lir saka state anaprong nungi sorkartemi inyakyim balala ajanga angatetteptsü meranga arur.

Iba atema tatishitsü tajung kaji Arunachal Pradesh kübok Tirap district nung Namghar and Heritage Centre yangluba ka lir.

Iba mapatong ya Assam Chief Minister Himanta Biswa Sarma, Naharkatia MLA Taranga Gogoi, aser Arunachal Pradesh Forest Minister Wanki Lowang nunger mangdang lir aser Namsang nung yanglur.

Iba otsütsü mapatong atema CM Sarma-i Rs 5 crore lemsüktsüogo aser mezüngbuba installment Rs 2 crore agütsüogo.

Arunachal Pradesh sorkari iba mapatong atema ali bigha 3 agütsür aser state sorkarisa approach road ka yangluogo.

MLA Taranga Gogoi, Dibrugarh District Commissioner Bikram Kairi, Arunachal Minister Lowang, aser Zila Parishad züngsem Wanphoon Lowang nunger aden.

Iba district kübok Deomali nung alir Assamese nunger kibong 80 kati iba mapatong atema pelaba metetdaksüogo.

Parnokisa Assam Chief

Minister Dr. Himanta Biswa Sarma dang iba mapatong atema sen lemsüktsüba atema pelaba shiogo.

Tesüiba nung Tirap district nung Namghars 60 liasü saka tang 7 dang anünga lir.

"1960 nungi ni Namsang nung Sanatan Dharma atema liyonga arur. Ni shitakbo Jorhat, Assam nungi lir. Küm aika Deomali nung Assamese nunger kibong 80 shi liyonga arur aser tang Namsang nung Namghar and Heritage Centre yanglur. Chief Minister Himanta Biswa Sarma-i iba mapatong tenzüktsüba atema kanga pelar" ta Namsang kübok Namgharia nung alir Chitra Sarma-i ashi.

Kamjong nung Hill Leaders' Day and Meeyamgi Numit among**Imphal, February 7, 2025**

(Agencies): Kamjong District kübok Kasom Somrei Village nung Hokolbarnü Hill Leaders' Day and Meeyamgi Numit mongogo.

Iba sentong ya Deputy Commissioner Rangnamei Rang Peter lenisüba kübok agiogo.

Iba sentong nung SP Kamjong Ningshem Vashum, Major Saurabh Jha (4AR Somrei Post), sub-division pezü nungi SDOs, DLOs, aser department balala nungi ketdangsürtem aden.

"Iba sentong ya government schemes aser services nung

public-i timtem ajurubatem lemsateptsü atema ayongzüker aser pei pei department temi onüktem süoki ia inyaktsü" ta DC Rangnamei Rang Peter-i ashi.

Social Welfare, Health, Education, Veterinary, Agriculture, Horticulture, aser Fisheries Department tem dangi applications 300 tashi arua liasü.

Health: Beneficiary 40 tashi PMJAY, CMHT, aser ABHA schemes kübok tajangzüku angu. Social Welfare: UDID (Unique Disability ID) cards 20 lema agütsü.

Identity Services: Aadhaar

cards 40 tema agütsü.

Fisheries: NFDP 20 aser PMMSY 15 applications benok.

Agriculture: RKVY applications 5 tashi angatettep aser Soil Health Cards 10 agütsü.

Medical Services: Nisung 80 tema angati anepalu aser mozütem agütsü.

Education: School 5 nem school stationery aser uniforms agütsü.

Iba sentong agiba sülen DC Kamjong Rang Peter-i yimtsüng 11 nungi headmen den senden ka amen aser terenlok mapa dak sendakba onüktem lemsatepa liasü.

Trump-i ICC nem tenokdangba agütsü

White House, Tsüklai/February 07 (Agencies): United States Tir Donald Trump-i International Criminal Court (ICC) nem tenokdangba agütsüogo aser iba tentet yagi Israel aser United States merenshir ta aitsü.

US tiri Brehostibar nikongdang executive order ka nung meyongnem agütsüba ajanga ICC staff aser US aser par tembar linük anema bushisüngdangba nung ICC yarir indang senotsü aser visa nung tenokdangba agütsür.

ICC-i America aser asen tembar Israel dak tenük yoker metemsü aser tamendak dak makaba nung mera agir ta totuyuba nung shia lir, ta White House-i ashi.

Iba mera ya Israel Ato Kilonser Benjamin Netanyahu-i US semdangba mapang ka nung agir. ICC-i November ita Netanyahu, taoba Israel defence minister Yoav Gallant aser Hamas ketdangsür ka aputsü totuyuba agütsü aser parnoki Gaza nung raraba mapang mapa tamajung inyak ta aitsü.

Trump indang totuyuba nungya The Hague nung amenoka aliba court-i tim masüba nung tashi amshia Israel nunger atema warrants agütsü ta shia lir.

White House-i Israel ya democratic linük ka aser par mitkari "laws of war" sülen shidak anidaker ta ashir.

"International Criminal Court-i Israel aser United States anema mapa inyakba ya lendong aketba tatishitsü lir aser America nunger tashi temeden nung aibelen aser security aser foreign policy nung tetsükdaktsü agütsütsüsa ICC-i yimya amshir," ta aitsü.

Iba tenokdangba ya nisung shirnok dak tenük yoker agütsüar tenüngtem sangdonga mali, saka taoba mapang Trump mezüng kemsük nung tenokdangba agütsüba nunga prosecutor aser la den yariteper dak tenük yoka liasü, shirnoki Afghanistan nung US sepaitemi raradang mapa tamajung inyak ta tai tonglokja ICC ajanga bushisüngdangba nung shilem agia liasü.

Iba totuyuba yagi "independent and impartial judicial work" nung timtem agütsütsü meranger, ta ICC-i ashi aser alima nung tim masüba mapa agi kongshia aliba tai maket nisung million aika nem teimla aser ochi obendang maneni agütsütsü ta ashi.

"Onoki 125 States Parties, civil society aser alima nung aliba linük ajunga dang justice aser fundamental human rights atema lungjemer nokdaktsü ayongzüker," ta ashi.

Iba mera agiba yong alima tesem balala nungi mepelaba aser aoksaba lemsateper.

European Council Tir An-

tonio Costa-i iba tenokdangba yagi international criminal justice system ajunga nung tetsükdaktsü agütsür ta ashi.

ICC amenoka aliba linük, Netherlands-i iba totuyuba asoshi sasar aser ozüng agi memerenshitetba anema raratsü asoshi court mapa ya tongtipang lir ta sangdong. Amnesty International-i iba mera ya junga meshisadangi inyak ta ashir.

Iba tenokdangba ya Netanyahu-i White House semdangba sülen iba Israel bhukumba temaitsü lir. Netanyahu-i US semdangba mapang US-i Gaza agitsü aser Palestine nungertem danga Middle East linük temi belenshitsü sentong Trump-i sangdonga liasü.

UN aser legal experts temi iba sentong ya international law anema asütsü ta shiogo. Tashiyim amshia pei telidak tesem nungi prokshidaktsüba ya ICC indang governing Rome Statue kübok mapa tamajung lir.

Züngsem 125 aliba ICC ya permanent court ka lir aser iba court yagi rara mapang mapa tamajung inyakba, meimchir anema mapa tamajung inyakba, kin ajunga samatsütsü merangba aser züngsem linük nung tashiyim amshiba mapa mechi nisung nem temerenshi agütsüteter.

ICC nung US, China, Russia aser Israel züngsem masü.

Sara-i tir atema tokteper

Manila, Tsüklai/February 07 (Agencies): Philippines tatong tir Sara Duterte-i linük tir asoshi tokteptsü jangraba lemsatepogo, shiba impeachment anema raratsü renemshiba mapang lir.

Linük indang House of Representatives ajanga tan hopta impeachment agizükba sülen yimjak nung mezüng Hokulbarnü jembidang arishi küm 46 tain Sara Duterte-i ashiba agi, iba ken o ya tangbo lar okatsür ket nung lir aser la tebu arishi küm 79 tain taoba tir aser okatsür Rodrigo Duterte ya pai dang mulungra lar defence team nung adentsü nokdanga mali.

"Legal team tang tashi defence atema renemer aser mera agitsü asoshi telemtetba agir," ta lai ashi aser lai tang tashi la anema ken o benoka aliba mezüngdang ta ashi aser la bhukumer tem dang lai takok angutsü ta amangang ta ayongzüker.

Lai mapa yutsütsü asoshi bilema mali aser "Asenok aji matong," ta ashi aser 2028 küm tir asoshi tokteptsü nükla mesamai lir ta shisem.

"Asenoki iba indangji

süoki ia bilemtar, ajisüaka nübu makai telemtetba agitsü tasak, anungji asenoki survey agia aji metettsüla, saka ibaji taruba küm agitsü," ta lai ashi.

Linük indang lower house-i Bodhbarnü Duterte anema ken o benoka lai Tir Ferdinand Marcos Jr, pa kinungtsü aser lower house speaker takum amokmeren, constitution nung aibelen aser ochimashi mapa inyak ta tai tongloktsü.

Lai aibelen mapa kecha meinyak ta ashi aser Hokulbarnüa lai nisung tepsettsü amokmeren masü ta nenshia ashi.

La office nungi indoktsü asoshi tangbo Senate-i obendang agütsütsü lir. Pa aija menden nungi atsüngdoktsü atema ken o jembidang senator shilem asem nungi ana teyari nüngdaker.

Duterte-i osangbener dang la temeden angutsüsa vote ngutettsü ta meshitettsü ta ashi.

"Tang iba mapang nung ni ashitsü ajak agi Tsüngremi Philippines kumzükan."

Bangladesh interim govt-i ki o jen meraksatsü ashi

Dhaka, Tsüklai/February 07 (Agencies): Taoba ato kilonser Sheikh Hasina den sendaktepa aliba ki ka raksatsüba mechi Bangladesh nung opposition political party aser kidanger India nungi meyiper timtem agütsütsü ta bilema alidang, linük tesem balala nung ki o jen raksatsüba nokdangtsü ta Nobel Peace Prize angur Muhammad Yunus-i aniba Bangladesh indang interim government-i Hokulbarnü sangdong ka nung metetdaktsü.

Hasina bhukumertem dak tenük Bodhbar aonung nungi tenzüka linük tesem balala nung ki aser businesses raksaja arur. Item ki o jen ya timba taoba mapang ozüng yanglurtem, Hasina'er Awami League party nungi lenirtem aser Cabinet züngsemtem indang lir, kong mi senloktsür aser ano Dhaka nung nüchiso bushibalenir Sheikh Mujibur Rahman indang ki densema

raksatsü. Kaketshir temi anir longkak aitba yong Hasina ya August 5 nü India-i jena oa lai küm 15 yimsü asüba tembanga liasü.

Hokulbarnep Yunus indang Press Wing ajanga sangdong tatsüka agütsüba nung iba ama mapa tamajung inyaker nem temerenshi tulu agütsütsü ta ashi.

"Nisung aser telok kari linük tesem balala nung institutions aser establishments tem raksatsütsü aser rongdoktsütsü merangba indang interim government-i süoki ia bilemtar. Sorkari iba ama inyaksangshi tashi amshia azüoktsü," ta sangdong ajanga ashi.

Nüburtem takum aser ki o jen kumzüka ayutsü sorkar renema lir, ta ashi.

Hokulbar nikongdang Yunus ajanga sangdong ka nung nübur ajunga dang tangsa tensa azüoktsü aser Hasina'er kinunger aser la

bhukumertem dak sendaktepa aliba ki o jen nung mokongshitsü ayongzüka liasü.

Bangladesh nüchiso nguogo ta Rehman-i 1971 küm sangdongba ki maker ghonda 24 dak tema lir iba sangdong ya agütsü. Bodhbar aonung iba ki raksatsüba sülen anogo tepiyong Hasina anemer aser kaketshir lenirtemi social media nung campaign agia liasü.

MENUNGRA BILEMTETER

HAV. IMKONGTIBA
(21.04.1980- 08.02.2024)



"Kibuba kü Sannüker, ni kechia manungtsü. Pai ni rem lanu rongnung mejangdaktsur."

Nai onok toktsür küm ka ajungba anogo onoki ne mapa tajungtem, ne tasutait, temeim aser taremzüker yimya menungra bilemteter.

Nai teti meimbatem,
Kinungtsü, Jabaso aser Kinunger Adianu.

OFFICE OF THE LONGJANG SENSO MUNGDANG

KONANG TETUSHI AGÜTSÜR



Rev. Dr. Prof. Mar Pongen



Rev. Tiatoshi Longkumer



Takatemjen Pongen

- Rev. Dr. Prof. Mar Pongen** Nagaland Baptist Churches Council (NBCC) General Secretary mendenbuba anguba,
- Rev. Tiatoshi Longkumer** Executive Secretary, Nagaland Police Baptist Churches Association (NPBCA) menden anguba,
- Takatemjen Pongen**, NCS Extra Assistant Commissioner (HQ) Kiphire 2025 Republic Day nung Governor Award anguba,

Longjang chir shirnokisa pei wadang nung temaba jenjang tongteta aser alijak nung alir ajaki nukshia aliba konang nungsang bener arutsüba ajanga Longjang chir ajak tenung nung Longjang Senso Mungdang ajanga konang tetushi agütsür.

Tarutsü nunga TSUNGREMI nenok mapa aser takum len aniang ta sarasademtsür.

Sd/-

M. Temjen Jamir
President LSM

Sd/-

T. Imti Pongen
Secretary LSM

ALI TAYOKTSÜ LIR

1. Old Showuba nung, 12397 Sqft. Four lane, fly over anasa.
2. Rs. 50 per Sqft. Aginüba tasazük angutsü.
3. (5 Pura) 1 Pura - 3,200,000/- Contact : 9863826159.

Boxer Lovlina Borgohain-i gold angu



Dehradun, Tsüklai/February 07 (Agencies): Hokulbarnü National Games nung Tokyo Olympic nung bronze medal angula Lovlina Borgohain-i tetsür seret 75 tuozük boxing nung gold angu aser trokben Asian champion Shiva Thapa-i tebur seret 63.5 tuozük boxing nung silver medal ngua liasü.

Paris Olympics sülen tang mezüngbuba asayamung nung shilem agidang Assam nungi Lovlina-i la dang

tanutsü Chandigarh nungi Pranshu Rathore madak round asemprong nung amokbanger asaya 5-0 agi takok ngua liasü.

Tebur light welterweight (63.5kg) division nung Thapa-i Services Sports Control Board boxer Vanshaj ya 3-4 agi makok.

Ano kasa anogo Services nungi Mandengbam Singh-i tebur flyweight (51kg) division nung Chandigarh nungi Anshul Punia madak 4-1 agi koka liasü.

Commonwealth games nung bronze medal angur Jaismine Lamboria ya Services nungi asaya aser lai tetsür tuozük seret 60 division nung Haryana nungi World Championship bronze-winner Manisha Moun madak 5-0 agi ayong-ayonga takok ngua liasü.

Ano Services asoshi gold medal ka Sakshi-i ngutet, shibai Himachal Pradesh nungi Vinakshi madak 5-0 agi akok.

Tetsür bantamweight category nung Madhya Pradesh nungi Divya Panwar-i Uttar Pradesh nungi Sonia Lather madak 4-1 agi takok ngua liasü.

Tetsür flyweight (50kg) event nung Himachal Pradesh nungi Nivedita Karki-i la indang jeret-peret aser tashi sayua Haryana tsür Kalpana madak takok ngua temaba jenjang tongtet.

Assam nungi taoba youth world champion Ankushita Boro-i tetsür welterweight (66kg) event nung Uttarakhand nungi Kajal madak unanimous decision nung takok ngua liasü.

Steve Smith-i Test century 36 yanglutet



Galle, Tsüklai/February 07 (Agencies): Steve Smith-i Test century 36 buba yangluteta Galle nung Test tanabuba anogo tanabuba nung Australia-i Sri Lanka amokbang.

Stumps nung Australia ya 330-3 liasü aser idangji Smith ya runs 120 yanlur not out nung lir, aser first-innings runs 73 agi timba nung lir.

Test centuries 36 ya England nunger Joe Root aser India nunger Rahul Dravid natia yangluteta lir, koba cricket asaya nung century timtiba yangluba jenjang

pongu buba nung lir.

Arishi küm 35 tain Smith-i iba alizüng ya innings 206 buba nung tongtet, koba tekeratiba jenjang tanabuba nung alitsü, aser pa jakdang külem linük nungi Ricky Ponting-i innings 200 nung centuries 36 yangluteta lir.

Smith-i iba century ya ball 191 nung yanglutet, kong pai fours toku aser six ka zükteta liasü.

Mezüng ball nung ba lbw angutsü amai liasü, saka technology ajanga sayuba nung ball yagi leg stump nung mokongshi aser ano runs 23

yanglur lia lbw angutsü ama aliba pa off stump indang line temalen aliba yong magütsü.

Tang Smith ya tesüiba Tests pongu nungi century pezü nguteta lir, shiba Tests 12 aser innings 23 nung century kata meyangluteti liasü.

Tang asaya nung Smith dang wicketkeeper Alex Carey-i timba yangluteta lir, shibai ball 118 nungi runs 139 (not out) yangluteter asaya anena lir aser tena ya fourth-wicket partnership nung tena senteper runs 239 yanglua lir. Carey asoshi ibai Test century tanabuba alitsü.

Sri Lanka nunger off-spinner Nishan Peiris-i Travis Head aser Marnus Labuschagne na out sütsüadang Australia ya runs 37 nguteter liasü aser Smith-i Usman Khawaja (36) den runs 54 yanglur wicket tasembuba agidaksü. Sri Lanka ya yashi 229-9 nung lia asaya anener Hokulbarnü runs 28 bendenloksema liasü. Australia aser Sri Lanka na tsüngta Test series ana asayaba nung ka Australia-i innings den runs 242 agi koka lir.

Alvarez aser Crawford na September ita tsüngteptsü



Tsüklai/February 07, 2025 (Agencies): Mexico nunger Saul "Canelo" Alvarez-i Saudi Arabia indang Riyadh Season nung four-fight deal ka agizükogo, anungji September ita America nunger Terence Crawford den tsüngteptsü.

Arishi küm 34 tain Alvarez ya Saudi nung May ita mezüng tsüngteptsü aser September ita Crawford den tsüngteper ano 2026 küm Saudi-i ayongzükba ana nung tsüngteptsü.

"Maparen temogo," ta Saudi Arabia indang general entertainment authority mendenpuba Turki Alalshikh-i Brehostibarnü X nung lemsatep.

Four-weight world champion Alvarez, shibai WBA, WBC aser WBO super-middleweight titles bena lir, pai "Apusoti adianu," ta langzüa zülü. Alvarez-

Crawford tsüngteptsü asoshi jembishinüba ya Brehostibarnü tamakok ajurur amai liasü. Alvarez ya YouTuber nungi boxer akumsang Jake Paul den May ita tsüngteptsü ang jembishinür ama liasü.

Saka Alvarez shibai professional fights 66 nungi 62 nung takok ngua lir, pai Alalshikh den maneni jembir Brehostibar aonung sentong melenshi.

Weight classes ana nung shingaia mokoktetba boxer tebur rongnung Crawford ya mezüngbuba lir.

Arishi küm 34 tain Crawford ya WBA light-middleweight champion lir aser pro bouts 41 prong pai akok, saka Alvarez asoshibo pa ya underdog asütsü.

"Ni September ita Canelo atar aser Riyadh Season nung alima aoksatsütsü," ta Crawford-ia X nung ashi.

FIFA-i Pakistan Football Federation anentsür

Tsüklai/February 07, 2025 (Agencies): Pakistan Football Federation (PFF) ajanga par constitution meyanglushiba mechi International Football Federation (FIFA)-i khen atema anentsüogo, kechiaser iba linük nung asaya junga ketdang asütsü atema nükdak ta world body-i ashir.

PFF congress ajanga item temelenshi meyanglu tashi suspend süa alitsü, ta FIFA-i ashi.

Pakistan football ya FIFA-i shimba Normalisation Committee kati June 2019 nungi ketdangsüa aru, shirnok dang elections agitsü aser football set-up nung telok ana aliba mürektetsü mapa nungloksü, saka parnoki item sentong shidak meinyaktet.

Normalisation Committee tekolak tem aser züngsemtem tesüiba küm pongu tsüngta melenaka Pakistan football nung tongtipang ken o kasa lir.

Normalisation Committee ya sorkar meyong Pakistan Sports Board den mangatettep nung liasü aser iba yongji ozüng tem meyanglushiteti aru.

Hopta tetenzüklen PFF Normalisation Committee chairman Haroon Malik-i parliamentary panel dang pa indang kümsük February 15 nung atemtsü aser constitution nung temelenshi melira Pakistan suspen asütsü ta tekumdangtsü shia liasü.

Temelenshi aliba ajanga ni linük indang football ketdangsüba tentet election nung candidate akumtsü masü, ta Malik-i jangja-jangja shiogo.

FIFA-i tuyuba ama PFF Congress-i temzüng melenshitsü memulungba ajanga mangatettep adok, ta Malik-i ashi.

Ibai 2017 küm sülen Pakistan Football Federation asemben buba anentsür alitsü.

BILEMDANGANG

"Mapa tajung pela agizükba nung mapa tajung inyaksü tera ayanger."